

吳興備志

二

新學
新學
新學

PDG

吳興備志卷之五

烏程董斯張遐周彙編

官師徵第四之四

潘愼修字成德莆田人歷知湖梓二州潭化中祕書監
李至薦之命以本官知直祕閣愼修善弈太宗屢召
對弈因作碁說以獻大抵謂碁之道在乎恬默而取舍
爲急仁則能全義則能守禮則能變智則能兼信則能
克君子知斯五者庶幾可以言碁矣因舉十要以明其
義太宗覽之稱善歷兩浙巡撫副使

宋史

齊廓字公弼會稽人舉進士歷知明舒湖三州積官光
祿卿廓寬柔恭謹人犯之不校弟唐爲吉州司理參軍

嘗與賢良方正對策入等越州蔣堂奏廓及唐父母垂老窮居鄉里二子委而之官唐復久不歸省於是罷唐令歸侍養廓方使湖南雖置不問然士論薄之

宋史

丁度字公雅祥符人累遷中書舍人時葉清臣請商州置監鑄大錢以一當十度奏曰漢之五銖唐之開元及國朝錢法輕重大小最爲折中歷代改更法雖精密不能期年卽復改鑄議者欲繩以峻法革其盜鑄昔漢變錢幣盜鑄死者數十萬唐鑄乾元及重輪乾元錢錢輕幣重嚴刑不能禁止今禁旅戍邊月給百錢得大錢裁十不可畸用舊錢不出新錢愈輕則芻糧增價臣嘗知湖州民有抵茶禁者受千錢立契代鞭背在京西有盜

殺人取其敝衣直不過數百錢盜鑄之利不啻數倍何以禁止度歷參知政事謚文簡

宋史

度著慶厯兵錄五卷邇英聖覽十卷龜鑑精義十卷
瞻邊錄一卷編年總錄八卷奉詔集諸儒武經總要
四十卷

楊紘刑部郎中至和元年十一月視事轉兵部郎中

談

志

紘字望之浦城人億從子爲億後用蔭補官歷江東
轉運按察使屬歲饑開義倉振之吏持不可紘曰義
倉爲民也稍稽人將殍矣紘用法嚴急與王鼎王綽
號江東三虎官至太常少卿平生聚書數萬卷手鈔

實事名窺豹篇

宋史八閩志

梅堯臣和楊兵部吳興五題詩云人知太守姓不減
漢公名按郡志慶厯皇祐閒守湖者僅一絃耳

王巖字總之趙州人曹利用得罪巖以所厚出知湖州
歷參知政事知樞密天聖中巖嘗使河北見曹瑋謂曰
君異日當柄政願留意邊防巖曰何以教之瑋曰嘗使
人覘元昊狀貌異常他日必爲邊患巖未以爲然比再
入樞密元昊反帝數問邊事巖不能對及西征失利議
刺鄉兵又久未決巖出知河南府始歎瑋之明識贈戶
部尙書謚忠穆

宋史

章岷字伯鎮司馬温公有送章伯鎮知湖州詩江鄰幾

有晚赴館宿覩吳興太守章伯鎮題壁記詩梅堯臣和
之略云題蹤有舊友連蹇嘗與渠昨歸天祿下念昔悲
有餘未久復外補安能戀清虛得請向茗雲幽懷寄禽
魚伯鎮蓋自館中出守者

岷以集賢校理知湖州見談志

岷浦城人舉進士與范仲淹同賦鬪茶歌岷詩先就
仲淹覽之曰此詩真可壓倒元白官至光祿卿

八閩
通志

大聖中岷爲平江軍節度推官知州盛度俾閱經史
凡及吳事者錄爲一書書成藏盛氏人不復見岷時
名籍甚廣新廨廨記多岷文

姑蘇志

刁衍字元賓昇州人大理寺丞獻文四十篇召試授殿
中丞通判湖州歷比部員外充崇文院檢討

宋史

衍後知湖州見郡志

胡宿字武平晉陵人知湖州歷樞密副使太子太師諡
文恭宿清謹忠實內剛外和羣居不譁笑言必思而後
對故臨事重慎不輒發發亦不可回止居母喪三年不
至私室少與一僧善僧有祕術化瓦石爲黃金且死將
授宿使葬之宿曰後事當盡力他非所冀也

宿知湖州前守滕宗諒大興學校費錢數十萬宗諒
去通判寮吏皆疑以爲欺不肯書麻宿誚之曰君輩
佐滕侯久矣苟有過曷不早正乃陰拱以俟其去而

非之豈昔人分謗之意乎坐者大慙謝其後湖學爲

東南最宿之力爲多

西吳里語

梅聖俞送胡武平解湖州詩曰始時繞郊郭水不通

蹶輪公來作新塘直抵吳松垠詳此卽今城東隄路

武平始築也

演繁露

嘉祐中鮑軻知湖州購秀州田十頃爲學糧歲可食百

員 顧臨湖學田記

軻永嘉人歷太常少卿

葉水心鮑清卿墓志

徐起字豫之郵城人舉進士終知湖州有善政

宋史

馬尋鄆州須城人歷兩浙轉運使歷知湖州州饑人或

羣入富家掠困粟獄吏鞫爲強盜尋曰此脫死耳情與

強盜異奏得減死論著爲例終司農卿

浙江志

馬尋字子正祥符初進士授吳江簿兄彝戒之曰到任半載可誦律書爲治民之本後彝至縣詰之答曰治在孔道疲於賓餞未暇及也彝不悅尋曰少緩期諷之至冬果精律學繼登朝籍久參法寺有平允之譽累著治聲彝之力也

姑蘇志

謝泌字宗源歙州人少好學有志操第進士累遷殿中丞獻所著文十篇古今類要三十卷召試中書直史館進銀臺司出知湖州歷太常少卿判吏部銓卒年六十三泌性端直爲政有惠愛頗好方外之學疾革服道十服端坐而逝

宋史

張昱之字景山滁人進士及第歷河北轉運使保州卒
殺通判石待舉爲亂昱之自魏馳至城下召諸將部分
攻城平之後以事被謫歷知湖州以光祿卿致仕昱之
喜吏事所至有聲

宋史

天章閣待制張昱之爲河東轉運安保州界河巡檢兵
士常以中貴人領之與使州抗州常下之其士卒甚
悍糧賜優渥雖不出巡衛常廩口食石倚舉以爲虛
費申轉運司罷之士卒怨怒遂作亂殺守倅朝廷遣
知制誥田況齎詔諭之乃降方其未降也中貴人楊
懷敏與張昱之不協在軍中密奏曰賊於城上呼云
得張昱之首我當降乞賜昱之首以示賊是時參知

政事富弼宣撫河北遇之卽遣中使還且奏曰賊初
無此言是必仇家爲之借令有之若以一卒故斷轉
運使頭此後政令何由得行上怒解昱之落職知虢

州 厚德錄

昱之一統志以爲江陰人昱音如舉物之舉見吳書

孫休傳

鮑當以職方員外郎知湖州有清風集一卷

談志

石林葉氏曰祖宗時見任官應進士舉謂之鎖廳雖
中選止令遷官而不賜科第不中則停見任其愛惜
科名如此淳化三年滁州軍事推官鮑當等應舉合
格始各賜進士及第自是遂皆賜第

鮑當善爲詩景德二年進士第及爲河南府法曹薛
尚書映知府當失其意初甚怒之當獻孤雁詩天寒
稻梁少萬里孤難進不惜死君庖爲帶邊城信粹大
嗟賞不復以掾屬待之時人謂之鮑孤雁

司馬溫公

詩話

張田字公載澶淵人歐陽修薦其才歷提點湖南刑獄
唐介與司馬光狀其傾險改知湖州歷直龍圖閣知廣
州田伉直自喜好嫚罵氣陵其下然臨政以清作欽賢
堂繪古清刺史像日夕師拜之蘇軾嘗讀其書以侔古
廉吏云

宋史

盛申甫司封員外郎集賢校理嘉祐三年十月視事五

年十月罷治平二年五月再任

談志

申甫餘杭人參政盛度子嘗爲福建轉運使頗以修

潔稱

宋史新編

陳亞字亞之揚州人慶厯三年以金部郎中知湖州仕至太常少卿近世滑稽之雄也嘗著藥名詩百餘首行於世若風月前湖近軒窗半夏涼棊怕臘寒呵子下衣嫌春暖宿紗裁及贈祈雨僧云無雨若還過半夏和師曬作葫蘆羓之類極爲膾炙亞嘗言藥名用於詩無所不可或曰延胡索可用乎亞朗吟曰布袍袖裏懷慢刺到處遷延胡索人此可贈游謁窮措大聞者莫不大笑

青箱雜記迂叟詩話參談志

亞性寬和累典名藩皆有遺愛然頗直率無威儀行坐常弄瓢子不離懷袖尤善唱清平樂知越州時每擁騎自衙庭出或由鑑湖緩轡而歸必敲鐙代拍潛唱徹三十六遍然後已亦其性也

亞又喜蓄書家藏數千卷見清波雜著

亞詩如浪平天接影山盡樹回身皆深得作者之格又有惜竹詩云出檻亦不翦從教長瘦叢年年當盛夏葉葉是清風句清格老皆此類

墨客揮犀

龐籍字醇之武城人仁宗朝歷同中書門下平章事以使相出知湖州累封穎國公謚莊敏籍曉律令長吏事治民頗有惠愛

宋史

吳中一士人曾爲轉運司別試解頭以此自負好附
託顯位是時侍御史李制知常州丞相莊敏龐公知
湖州士人游毘陵挈其徒飲娼家顧謂一騶卒曰汝
往白李二我在此飲速遣有司持酒肴來李二謂李
御史也俄頃郡廚以飲食至甚爲豐腆有一蓐醫適
在其家見其事後至御史之家因語及之李君極怪
使人捕得騶卒乃兵馬都監所假受士人教戒就使
庖買飲食以給坐客耳李乃杖騶卒使街司逐士人
出城郡寮有相善者出與之別唁之曰倉卒遽行當
何所詣士人應之曰且往湖依龐九耳聞者莫不大

笑
夢谿筆談

按籍之守湖僅戴沈括書及攷仁宗紀第云皇祐五年龐籍罷知鄆州籍本傳復云厯知并州青州秀州□州初未言莅湖也然存中嘉祐二年登第莊敏事其所目擊者又家錢唐去吳興僅百里寧有父母之邦而紀載舛錯乃爾豈脫脫輩修史時刪之耶

唐淑問字士憲江陵人介子也第進士擢監察御史裏行力數中丞滕甫之短神宗以爲邀名出判復州厯知湖州哲宗立司馬光薦其行己有恥召爲左司諫

宋史

滕宗諒字子京河南人舉進士累遷左司諫坐言宮禁事降知信州徙湖州問民疾苦省視風俗請胡瑗爲教授厯天章閣待制知蘇州宗諒尙氣倜儻自任及卒家

無餘財所莅州喜建學而湖州最盛所著有諫疏二十

餘篇

宋史

宗諒在湖州進柑子詩仁宗賜獎諭敕書

談志

宋經籍志宗諒大唐統制三十卷擬狀注制集十卷

陳侗字成伯太常博士集賢校理知湖州

東林山志

侗莆田人富弼知汝州辟侗從事官至寶文閣待制

八閩志

侗東坡同年嘗知陝州見欒城集東坡亦有詩送之
東坡集陳侗知陝州制云爾出入冊府幾二十年安
於分義不妄附麗以干進

翰苑新書載曾鞏送陳成伯守湖州詩云擊鼓鳴笳